

Guangjisi Minzcu Bau

ganhhau: CN45-0036 B.2018 Nd.2 Ng.28 liggaeuq fouhswt nienz ndwencieng cibsam

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3313期

Hozciz Si Gaenxmaenx Doidoengh Hwnghat Gij Saehnieb Ndawbiengz Minzcu Vunznoix

河池市积极推动少数民族社会事业发展

Geij bi neix daeu, Hozciz Si yawjnaek hwnghat minzcu vwnzva、minzcu gyaayuz、minzcu diyyuz daengj gak hangh saehnieb, aeundaej hwnghat moq.

It dwg haiguh hong bangbouj hauejhag hagseng maenhndei minzcu vunznoix daegbied gungzhoj. Bi 2017 ceng'aeu ndaej 40 fanh maenz ngaenzcienz cienhangh bangbouj hauejhag hagseng maenhndei daegbied gungzhoj, gaijgez le 212 boux hagseng maenhndei minzcu vunznoix daegbied gungzhoj hauejhag hoj vwndiz. Bangbouj daihhagseng 94 boux, moix boux bangbouj 3000 maenz, gunguh bangbouj 28.2 fanh maenz; bangbouj gauhcunghswng 118 boux, moix boux bangbouj 1000 maenz, gunguh bangbouj 11.8 fanh maenz.

Ngeih dwg guh ndei bauq ancoh

aenmbanj daegsaek. Hwnghat buek diegguhyiengh aenmbanj daegsaek gig miz daiqbiuj he, baujlouz le buek minzcu daegsaek vwnzva caeuq daegsaek ranzgaeuq he. Bi 2017 daengx si gunguh ceng'aeu ndaej baecinj ancoh 5 aen mbanj daegsaek guekgua gaep, ceng'aeu doeksaed soqliengh aenmbanj daegsaek guekgua gaep ciemq daengx gih 13%, youq daengx gih vih daihngaih.

Sam dwg gaenxmaenx banh daengx si bouxcoz nyezrauh minzcu diyyuz doxdax. Bi 2017 youq Vanzgyangh banh daengx si bouxcoz nyezrauh minzcu diyyuz doxdax, 11 aen yienh(si、gih) doihdaiqbiuj、200 boux yindungyenz camgya doxdax, doidoengh daengx si minzcu diyyuz hauej hagdangz hozdung.

Seiq dwg guh ndei hong swncienz、baujhoh caeuq hwnghat

minzcu vwnzva. Anbaiz minzcu bouhmonz bae daengz minzcu yangh haiguh diyyenz minzcu vwnzva caeuq aen hozdung angqhoh ngoenzcienz minzcu; dazyinx Vanzgyangh Yananz Yangh ciet faenlungz、Denhngoz Yen "ciet va'gyaeuq" caeuq ciet caemzgej caeuq Duh'anh、Bahmaj、Dava sam yienh Yauzcuz "ciet cuzcu". Banh aen ban son'gyauq soucomz gij swliu 《Guengjsae Doengceiq·Minzcu Ceiq》Hozciz Si、aen hoih yaenglwnh vwnzva angqhoh ngoenzcienz Yauzcuz Hozciz Si bi 2017 daengj, diucaz 142 aen hozdung angqhoh ngoenzcienz minzcu, raiz faenzgauj 《Guengjsae Minzsuz Ciet-hoih Mingzloeg》, vih baujhoh caeuq hwnghat minzcu vwnzva dwk roengz giekdaej maenhndei.

(Hozciz Si Minzcunghvej)

Sanhgyangh: Lungz Sae Caez Foux Gvaq Ciengmoq



三江: 龙狮齐舞闹新春

Ndwen 2 ngoenz 21, dwg liggaeuq ndwencieng coroek, Sanhgyangh Duncuz Swciyen Gujyiz Cin dohyeh gvangjangz banh "aenvenz raqraq hom cieng naek·lungz sae caez foux gvaq ciengmoq" hozdung. Vunzlai dangdieg doenggvaq foux lungz、foux saecej caeuq aenvenz caijdangz daengj daegsaek hozdung, angqhoh ciengmoq. Ndaw doz dwg vunzlai youq gwnz daiz foux lungz angqhoh ciengmoq.

(Vuz Lenzinh/吴练勋)

Lungzlinz Banh Bi 2018 Ndwencieng Betyaem Naenghcieingq Comzyienj

隆林举办2018年春节壮族八音坐唱展演

Ndwen 2 ngoenz 23(ndwencieng cobet), Lungzlinz Gak Cuz Swciyen Aen Yozvei Bouxcuengh youq yienhsingz minzcu vwnzva diyyuz gvangjangz banh bi 2018 ndwencieng betyaem Bouxcuengh naenghcieingq baij yienj, miz 17 aen doihbetyaem daj gak yanghcin caeuq yienhsingz daeu haenx camgya yienjok, yinx ndaej baenz fanh boux vunz bae yawj.

Betyaem ciengq swz neiyungz

fungfouq, haujlai dwg daj swz fwen daezlien okdaeu. Baez daengz hauej ranzmoq、baenzgya、hohsouh daengj seiz angqyangz, vunzlai Bouxcuengh Lungzlinz cungj maij cingj ban betyaem daeu guh'angq. Seizneix aen yienh neix haujlai mbanj Bouxcuengh riuzhengz fuengzcug guh aen doihbetyaem he, miz mbanj daengx ranz seiq daih caez camgya yienj, boq rag danz ciengq yienghyienh guh, nauh-

yied dangqmaz. Betyaem naenghcieingq dwg cungj gizey hingz sik beksingq Bouxcuengh Lungzlinz gyaemzmaij he, youq aen yienh neix gaenq riuz miz sam bak lai bi lizij.

Ndwencieng geizgan, banh cungj hozdung neix, mboujdan fungfouq gij vwnzva saedcej vunzlai, youh gyalai gij heiq hom ngoenzcienz, ndaej daengz gyoengq vunzlai haen.

(Dauz Dwzgvangh/陶德光)

SIUSIK DINJ

简讯

● Bineix ndwencieng geizgan, Vuzcouh Si gak ginggih、dieg lijyouz lajmbanj caeuq nungzyahloz doiok le gak cungj minzsuz vwnzva hozdung, yinx ndaej haujlai bouxhek bae youz. Ciuq gyoepsuenq, aen si neix ndwencieng geizgan gunguh ciepdaih bouxhek 126.03 fanh vunzbaez, doengzbeij gyalai 35.07%, saedyienh lijyouz siuhfei 7.75 ik maenz, doengzbeij gyalai 33.44%.

(Cungh Dwzyen)

● Mungzsanh Yen youq bineix ndwencieng geizgan, cawz youq yienhsingz banh foux lungz、foux saecej caeuq gak cungj vwnzyi biujyien hozdung le, lij haiguh vwnzyi hauej Mbanjyauz yienjok hozdung, daiq vwnzyi cezmu maenhndei bae yienjok hawj vunzlai yawj, caux ok gij heiqfaenh ngoenzcienz angqyangz huzndei.

(Dai Lenzswng)

● Mboengqneix, Lingzyinz Yen Yihungz Yauzcuz Yangh Lenzdwng Cunh caeuq Lozfung Cunh lienhab banh bi 2018 ndwencieng minzsuz vwnzva lenzyiz hozdung, gyoengq beixnuengx Yauzcuz mbanj henzyawj doxcomz giz ndeu, doenggvaq minzsuz comzyienj、bau aendomq、bengcag doxdax、eu fwen daengj conzdungj minzcu minzsuz hozdung, caez gangj gij cingzngaih minzcu, caez gvaq cietndei ciengmoq.

(Cinz Myauzswng)

● Ndwen 2 ngoenz 25, Yungzanh Yen banh aen hoih cienciengz ciu vunzhong dieg senj dieg bangfuz anyouq caeuq bi 2018 "rumzcin hengzdoengh" Guengjdoeng Guengjsae guh hong doxgap, 139 aen giyez daj Baekging Si、Guengjdoeng Swngj Can-gyangh Si、Guengjsae Liujcouh Si daengj swngj si daeu haenx, daezhawj gvaigi、baujan、dengungh daengj 10000 aen couhnieb gangjvei, hawj vunzlai gungzhoj dieg senj dieg bangfuz anyouq saedyienh gij moegbiu "senj ok ndaej、youq roengz ndaej、ndaej couhnieb、miz souhaeu onjdingh".

(Danz Gaijhing)